

Pauc sustegn per la pcd

(sda/anr/ld) Suentar il cler «na» dal cussegl federal e dals directurs da finanzas dals chantuns refusa er la gronda part dals partidas l'iniziativa da la pcd. Quella vul liberar da la taglia ils supplements dals uffants ed uschia distgargiar las famiglias. Giuvens geniturs da la Partida liberaldemocratica svizra: Ils Liberals (pld), da la Partida socialdemocratica da la Svizra (pss), da la Partida burgais-democratica (pbd), dals verds e dals verd-liberals han prendì posiziun davart l'iniziativa da la pcd che vegn en votaziun dal pievel ils 8 da mars proxim. Ils exponents da las numnadas partidas politicas considere-

schan l'iniziativa da la pcd sco fallada via. Il recept da la pcd saja memia char. La confederaziun ed ils chantuns perdessan var ina milliarda francs taglias per onn. Gia oz sajan blers chantuns confruntads cun deficits e stoppian serrar pli fitg la tschinta, è vegnì fatg valair. In gea a l'iniziativa manassia ad ina situaziun anc mendra. Il facit fiss programs da spargn che pertutgassan las famiglias cun entradas pitschnas. Da l'iniziativa da la pcd profitassan principalmain famiglias cun entradas autas. Gia uss na paja la mesadad da las famiglias nagina taglia da la confederaziun, han ils opponents punctuà.